

فريق التفريغ بموقع الطريق إلى الله  
يقدم  
من سلسلة "على فين يا شباب؟"  
ليلة خميس



لفضيلة الشيخ: حازم شومان

[رابط المادة:](http://www.way2allah.com/khotab-item-7349.htm)

الحمد لله وكفى وسلاماً على عباده الذين اصطفى، اللهم لك الحمد كله ولكل الملك كله وبيدك الخير كله وإليك يرجع الأمر كله، اللهم صل على عبدك ونبيك وحبيبك وحبيبنا محمد صلى الله عليه وسلم في الأولين والآخرين والملايين الأعلى إلى يوم الدين، ثم أما بعد:

### الجرح الأكبر في قلب النبي صلى الله عليه وسلم

تخيل لو النبي عليه الصلاة والسلام ربنا أحياه دلوقت ومشي في الشوارع، لقى الناس جايته له "يا رسول الله، الحق يا رسول الله"، "فيه إيه؟"، "إنت اتشتمت يا رسول الله، الغرب شتموك يا حبيب الله"، النبي عليه الصلاة والسلام مشي في الشوارع لقى مظاهرات وعربات وشباب طالع قال: "إيه ده؟ هو كل ده عشاني؟!" قالوا له: "لا يا رسول الله، ده عشان مصر كسبت في الدورة الأفريقية"، النبي لقى ألف مؤلفة مجموعة في الاستاد بتاع القاهرة "إيه ده؟ ده كل ده عشاني؟!" قالوا له: "لا يا رسول الله، ده عشان ماتتش الأهلي والزمالك الليلة"، الرسول عليه الصلاة والسلام لقى الجرائد مكتوب عليها الخائن، الخايب "إيه ده؟ هل ده اللي شتمني؟" قالوا له: "لا يا رسول الله، دا ده حارس المرمى بتاعنا لما ساب الفانلة الحمرا وخانها وسافر بره".

النبي عليه الصلاة والسلام لقى ٢٣ مليون إس.إم.إس معموتين، قال: "ده دول معموتين لنصرتي؟" قالوا له: "لا يا رسول الله، ده عشان الشاب المصري اللي في تصفيات ستار أكاديمي شباب مصر باعتين يشجعوه"، النبي عليه الصلاة والسلام لقى ناس جايته عليه "يا رسول الله إنت اتشتمت" رجاله وستات وبنات جامعة وأولاد، قال لهم: "إيه ده؟ انت مين؟ إنت مين؟" "أنا مسلمة يا رسول الله" "فين حجابك؟" "وإنت مين؟" أنا مسلم يا رسول الله "أمال المساجد دي كلها ده الأذان أذن دلوقت إنت ماكنتش فيها بتصلني ليه؟".

يا ترى يا جماعة، هييقي الجرح الأكبر في قلب رسول الله صلى الله عليه وسلم هو اللي شتموه في الدنمارك وأوروبا والا احنا يا جماعة؟ الجرح الأكبر الشتيمة اللي اتشتمت للنبي عليه الصلاة والسلام في صحف فرنسا والا التوادي والجامعات بتاعة المسلمين؟

## السبب في ضياع أمة محمد:

يا ترى يا جماعة، يا ترى - تخيل معايا - لو النبي ربنا أحياه - بس أحياه ليلة الخميس - إيه ليلة الخميس؟! لا، كله إلا ليلة الخميس، أنا حاسس إن فيه شباب اللي فاهم أنا بأقول إيه قلبه هيقف دلوقت وهيرجف، لا، كله إلا ده، النبي عليه الصلاة والسلام مايشوفناش واحنا في الحالة دي مايشوفش أمهه وهي وصلت للدرجة دي، ليلة الخميس اللي عايز يعرف أمة محمد إيه بعد ما كانوا خلفاء الأرض، أمة محمد ليه بعد ما كانت أعظم أمة في العالم كله، ليه أمة محمد توصل اللي وصلت له ده؟ ليه ضاعت العراق وفلسطين؟ ينزل ليلة الخميس وهو يعرف السبب إيه؟

ليلة الخميس شباب مربطين مع بعض ومجاررين الاستاد عشان ينزلوا يلعبوا كورة، وشباب مربطين السهرة في النادي، وشباب مربطين السهرة في المصيف على البلاج، وشباب مربط مع اللي يحبها وبتحبه سهرة على الكورنيش، وشباب مركب طقم صوت بـ ٨ آلاف جنيه في عريته عشان ليلة الخميس، مخصوص يلف في الشوارع بيها وشباب مربط سهرة على القهاوي.

## تخيل حalk والنبي جاي يدق على بابك ليلة الخميس

ليلة الخميس يا جماعة، تخيل النبي لو نزل وذهوله عليه الصلاة والسلام، وحرقة قلب النبي عليه الصلاة والسلام "مين دول؟ دول أحفاد الصحابة إزاي؟ دول اللي أنا عشت عمري عشانهم؟ إزاي؟!" النبي ذهل، بعثت عليه الصلاة والسلام، قال: "أنا لازم أشوف حد أروح لحد بيته أشوف، أشوف هم مين دول ودول، وصلوا كده إزاي؟" النبي عليه الصلاة والسلام اختار بيته، راح لبيت، كان هو البيت بتاعك أو البيت بتاعك.

دلوقت أهه النبي عليه الصلاة والسلام راح على البيت بتاعك وبيخبط، في اللحظة دي كنا ليلة الخميس بقى وإنْ قاعدة ماسكة في إيد قلم الروج وإيد إزازة البارفان، وإنْ قاعد في إيد المكالمة العاطفية اللي بتتكلم فيها، وقاعد بتتشيّت على النت وفي نفس الوقت فيه كليب على الدش شغال، والنبي خبط، خبط، جريت، جريت بتبعصوا من العين السحرية، لقيت واحد وشه بيبخ نور، وشه مليان نور عليه الصلاة والسلام، "إنت مين؟" "أنا رسول الله"، حبيب الله، حبيب قلبي يا رسول الله إنت جيت تزورني يا رسول الله، كنت هتموت من الفرح، كنت هستجنني من الفرح، جاي تمد إيدك تفتح الباب إيه ده يا نهار أبيض!

إزاي والمكالمة اللي أنا بأتكلمها والشات اللي أنا فاتحة والموقع اللي أنا فاتحة؟! رميت التليفون وجريت بسرعة توطي الكليب وتقلل الكليب التليفزيون على أكثر قمت شايل الفيشة بتاعة الكمبيوتر وبتابعة التليفزيون مرة واحدة، جريت تفتح الباب وإنْ بتجرى تفتحي الباب إيه ده؟ الله! هأقابل النبي بشعرى كده إزاي؟

شعري ده لسه معمول موزمبليه، ده لسه طالع من الخلاط، ده إنتِ هتبقي موزامبلية لو مافتقيش والله، طيب أعمل إيه؟ طيب جريتي تدوري على طرحة ما فيش غير الطرحة اللسبانيش "طيب أعمل إيه؟" في الآخر لقيتي إيشارب ينفع إنك تلبسيه قدام النبي عليه الصلاة والسلام، جايه تجري بفتحي الباب بفرحة وبلهفة "البنطلون اللي أنا لابساه؟!" جريتي تدوري على أي عباية، في الآخر لقيتي عباية الصلاة بتاعة والدتك.

في النهاية إنتَ بتجري تفتح للنبي افتكرت الصور اللي في أوضتك، "لو النبي قال لك أدخل أوضتك أعمل إيه؟" جريت على الأوضة بسرعة بتشيل الصور لأول مرة تبص "مین دول؟ مین اللي أنا معلق صورتهم دول؟" وانت بتشيل صورة وقعت على المكتب لقيت شرايط أغاني أجنبى وعربي "إيه الأغاني الأجنبى دي؟! أنا مش عارف معناها أصلًا أنا بأسمعها ازاي؟! طيب أعمل إيه؟ طيب أتخلص منها ازاي؟ شلت كله في صندوق الزبالة مكانه الطبيعي، وجريت بسرعة عشان تفتح الباب للنبي.

وانت بتجري تفتحي الباب للنبي "الماكياج، الميك اب اللي أنا بقالى ساعتين قاعدة اعمله، طيب أمسحه، لما جري بسرعة امسح وشي".

وانت بتجري تفتح للنبي وتقفل زرائر القميص وتشد السلسة من رقبتك، وانت أخيرًا بتجري تفتحي للنبي بعد ما شيلتي والباب قعد يخطب، كل شوية يخطب، كل شوية يخطب، النبي عليه الصلاة والسلام خطب عليكم لغاية دلوقت ٣ مرات بتعو السُّنة يا شباب، سُنة النبي عليه الصلاة والسلام.

بتتجري افتكرتي "يا نهار أبيض! البارفان اللي أنا حطيته ده أنا لازم أدخل استحم عشان البارفان، لا الحمد لله ما كنتش لسه حطيته، كانت الإلزامة لسه في إيدى، طيب، الصورة اللي في الشنطة لو النبي سألني صورة مين دي؟" جريتي بسرعة ترميها في الزبالة، ترمي مين في الزبالة؟ جريتي تفتحي، جريت تفتح، فتحتوا مالقيتوش حد، "النبي فين؟" بتجري بتتصي من السلم بجنون "يا رسول الله" النبي لسه بينزل، أهه يا حبيب الله عليك الصلاة والسلام أنا فتحت يا رسول الله، أنا مشتاق لك قوي يا حبيب الله، وأنا فتحت يا النبي الله.

### تخيل حالك والنبي في بيتك

النبي طلع عليه الصلاة والسلام ودخل وقعد، أول ما النبي قعد "إيه ده؟"، "يا نهار أبيض! ريحه السجاير نسيت أطفى السيجارة" دي حاجة تنسى، وفي نفس الوقت لقيت المحمول بيرن، أول مرة تحسي إن قلبك وقف من رنة المحمول دي، رنة محمول مسلم دي؟! وبعد كده بتتصي في الرقم "يااااه هو ده وقتنه؟! ده وقته إن الرقم ده بيجي دلوقت؟! قلبك كان هيقف، قلبك كان هيقف، تلغى يتصل تاني، تلغى يتصل تاني، تلغى يتصل على البيت، النبي عليه الصلاة والسلام قاعد ساكت عليه الصلاة والسلام، وبعد كده النبي بص اللي في جيبك كده، وجيبك منفوخ وقال: "هات لي المصحف اللي في جيبك ده" قلت له يا رسول الله يا حبيب الله، ده مش مصحف، يا رسول الله، دي علبة سجاير يا رسول الله، دي علبة تدخين يا رسول الله" هتقول للنبي عليه الصلاة

والسلام إيه؟ بعدها الأذان أذن هتنزل تصلي، إنت كل مرة بتنزل تصلي والا هتسافق؟ ولو قلت مش نازل تصلي؛ هتكذب على النبي عليه الصلاة والسلام إزاي؟ هتعمل إيه؟ موقف رهيب، عارفين النبي ساعتها هييعمل إيه؟ عارفه النبي ساعتها هييعمل إيه؟ النبي مش هيزعق لك، مش هيغضب، مش هيسيبك ويمشي، النبي هيحضنك وهبيكي، وهييقى عينيه زي الدم من كتر الدموع وهيقول لك "ده أنا اللي ضيغت عمري عشانك ده أنا -عليه الصلاة والسلام- ده أنا، أستغفر الله العظيم، ده أنا اللي أتفق عمرى عشانك، ده أنا اللي اجهدت عمرى ليل، نهار عشان إنت تطلع مسلم.

ده انت اللي عشت حياتي عشان أنقذك من النار، طيب اشفع لكم عند ربنا ازاي؟ أشفع لكم لما تيجوا لي عند الحوض عند ربنا إزاي؟ أعمل لكم إيه؟ هأقول لكم إيه؟ أعمل لكم إيه يوميه؟" تخيلوا النبي عليه الصلاة والسلام هييقى قلبه ساعتها شكله إيه يا جماعة؟

### مستعد الليلة تتحاسب؟

تخيلي إن ده مش النبي، تخيلي إن ده ملك الموت، ملك الموت؟! آه، مش هيقف يستنى على الباب، ملك الموت مش هتلحق إنك تغير الواقع بتأمرك قبل ما يدخل، ملك الموت، مش هتلتحق إنك تداري من المنكرات اللي في حياتك قبل ما يدخل.

مستعدة الليلة تنزلي تحت التراب؟ الليلة؟! آه تتحاسب؟ مستعد الليلة تتحاسب؟ مستعد الليلة تقف بين أيديين ربنا وتتحاسب على كل حاجة عملتها؟ مستعد إنك انت تقبض روحك ليلة خميس؟ لا كله إلا الليلة دي، ماقدرشن، ماقدرشن الليلة دي.

### هنفوق إمتي يا شباب؟

مطمئنين ليه؟ إحنا إيه اللي مطمئنا يا جماعة؟ مطمئنين ليه؟ ده لو طالب جه دلوقت وقلنا له: "انت عندك امتحان ثانوية عامة بكرة" قلبه هييف، هتجيله سكتة قلبية، ده فيه لعيب في الملعب، شفته بعينيه على النت، الحكم اداله كارت أحمر، اللعيب جاله سكتة قلبية ووقع، مات فيها، مات، أمال إحنا مطمئنين ليه؟ مطمئنين ليه يا جماعة؟

ده انت لو داخل امتحان ومتوقف عليه تجاحك في التيرم أو سقوطك؛ ما بتنامش طول الليل، ولو امتحان يتوقف عليه إنك تعدى السنة اللي بعدها أو تقع وتسقط سنة، بتبقى مرعوب وقلبك هييف، ولو امتحان بكالوريوس أو ماجستير أو دكتوراه بتبقى خلاص شعر راسك واقف، طيب، لو امتحان يتوقف عليه مصيرك، إنت مستعد له ولا لأ؟ إنت مستعدة لملك الموت دلوقت ولا لأ؟ إنت مستعد للزيارة المفاجئة الليلة ولا لأ؟

مستعدين ولا لأ يا شباب؟ يا جماعة، لو الواحد بيأكل أكلة لحوم وفواكه وفراخ و.. ومعهوش يجيب تمن الأكلة اللي بعدها بييقي قاعد قلقان، إنتمش قلقانين من جوع خمسين ألف سنة يوم القيمة ازاي؟

يا شباب، ده الواحد لو قاعد في السحور بيأكل لقمة ويشرب بق ميه ، يأكل لقمة ويشرب، جركن ميه من كتر رعبه من عطش ١٢ ساعة أو ١٤ ساعة، أمال عطش خمسين ألف سنة معملناش حسابه ازاي؟ ده يقول لك الفطن اللي بيأمن مستقبل أولاده وهم لسه عيال، يا جماعة، احنا عايزين نفوق، عايزين نتبه، مطمئنن ليه؟

### أوصاف القيامة في القرآن:

ده ربنا وصف القيامة في القرآن بأوصاف تخلق القلب: "يَوْمَ تَرْجُفُ الْأَرْضُ وَالْجِبَالُ" المزمول: ٤

"يَوْمَ ثُبَدَّلَ الْأَرْضُ غَيْرَ الْأَرْضِ وَالسَّمَاوَاتُ وَبَرَزُوا لِلَّهِ الْوَاحِدِ الْقَهَّارِ" إبراهيم: ٤٨

"يَوْمَ نَبْطِشُ الْبَطْشَةَ الْكُبْرَى إِنَّا مُنْتَقِمُونَ" الدخان: ١٦

"يَوْمَ تَرُوَّنَهَا تَذَهَّلُ كُلُّ مُرْضِعَةٍ عَمَّا أَرْضَعَتْ" الحج: ٢

"وَيَوْمَ يَعْضُّ الظَّالِمُ عَلَى يَدِيهِ يَقُولُ يَا لَيْسَتِي اتَّخَذْتُ مَعَ الرَّسُولِ سَيِّلًا" الفرقان: ٢٧

"وَيَوْمَ يُنْفَخُ فِي الصُّورِ فَقَرَعَ مَنْ فِي السَّمَاوَاتِ وَمَنْ فِي الْأَرْضِ" النمل: ٨٧

"يَوْمَ تَبَيَّضُ وُجُوهٌ وَتَسْوَدُ وُجُوهٌ" آل عمران: ١٠٦ ، كلها أوصاف تخلع القلب، ازاي قلبنا مابيخافش؟ ازاي يا

جماعة؟ ازاي يا شباب؟ مطمئنن ليه؟ ورسول الله صلى الله عليه وسلم بيقول: "لولا أن لا تدافنوا لدعوت الله أن

يسمعكم من عذاب القبر" صحيح مسلم، تدافنوا يعني لو كان ربنا سمعنا عذاب القبر؛ ما كانش حد لا رضي

يدفن ولا دفن حد من حبایه.

### منظر مرعب لقبر مغني مسلم

تخيلوا يا جماعة ، اتفرجت لسه امبراح على فيلمين على النت محظوظين جمب بعض على أحد المواقف يخلعوا القلب لمغني مسلم، الفيلم الأولاني منظره وهو ماسك العود قاعد على المسرح بيعزف وبيغني، وجأة قام واقع من طوله، كل الدنيا اتقلبت، مات ، مات وهو بيغني.

المنظر الثاني، والله العظيم يا شباب، والله العظيم، الفيلم الثاني تصوير لقبره بعد مماته، منظر يشق القلب وبشرخه، القبر جايبينه في الأول القبر ثقوب، ثقوب، وبعد كده المنظر المرعب، تعابين طالعه وداخله من الثقوب دي، منظر عمرنا ماشفناه في حياتنا، منظر عمرنا ماشفناه على الإطلاق في حياتنا، التعابين مالية القبر، التعابين حفره في كل حنة في القبر، عند الراس وعند الجسم وعند الرجلين، تعابين ضخمة بحق و حقيقي، سبحان الله العظيم!، الفيلمين تحت بعض في نفس الموضع.

### مطمئنن ليه؟

يا جماعة، مطمئنن ليه؟ وربنا سبحانه وتعالى بيقول: "فَلَمَّا أَنَّ الْمَوْتَ الَّذِي تَفِرُّونَ مِنْهُ فَإِنَّهُ مُلَاقِكُمْ" الجمعة: ٨، تخيل منظر مضحك، فيه واحد بيجري وفيه واحد بيجري وراه، وبيجري وبيجري، وبيهرب من بيت ومن

سطح لسطح، قاعد يهرب بأي طريقة، ولما بدأ يحس إنه خلاص هرب، بيتص وراه "الحمد لله مش واريا"، لقاوه في وشه "فِإِنَّهُ مُلَاقِكُمْ" مطمئنين ليه؟ مطمئن على الله صلى الله عليه وسلم يقول: "والله لو تعلمون ما أعلم، لضحكتم قليلاً، ولبكيرتم كثيراً، وما تلذذتم بالنساء على الفرش، ولخرجتم إلى الصعدات تجأرون إلى الله" حسنة الألباني

لو تعلمين ما يعلم! لو تعلم ما يعلم! "لو تعلمون ما أعلم"، لو تعرفوا، آه لو إنت بتعصي ربنا، شفتني عرض حي للنساء وهم أكثر أهل النار، آه، لو إنت بتعصي ربنا شفت أوين شو لجهنم، فيها المعاشي، فيها عقاب المعاشي اللي إنت عايز عملها، دي، آه يا جماعة، "لو تعلمون ما أعلم لضحكتم قليلاً"، كت كل ماتضحك تفتكر الآخرة تسكت على طول، "ولبكيرتم كثيراً" كل ماتفتكر يعني إيه موت تبكي، كل ماتفتكر يعني إيه قبر تبكي، كل ماتفتكر يعني إيه نار تبكي، كل ماتفتكر يعني إيه جنة بتروح من إيديك تبكي، كل حاجة بتفكرك بالآخرة، شوية مية تشرق فيهم تفتكر "بَسَرَّعَةٌ وَلَا يَكُادُ يُسْعِغُهُ" إبراهيم: ١٧  
لقطة تقف في زورك تفتكر قول الله سبحانه وتعالى: "وَطَعَامًا ذَا غُصَّةً وَعَذَابًا أَلِيمًا" المزمول: ١٣  
"لضحكتم قليلاً، ولبكيرتم كثيراً، وما تلذذتم بالنساء على الفرش"، كان كل الشهوات دي راحت مننا، "ولخرجتم إلى الصعدات تجأرون إلى الله" ، نجأر ونقول: "يا رب ارحمنا يا رب".

مطمئنين ليه يا شباب؟ لما الواحد بيشفوف شلة قهوة، شلة شباب قاعدين على القهوة، بيتصوا للدش، ويعاكسوها دي، ويشربوا دخان وبيضحكونا، أكبر جريمة في اللي بيعملوه إنهم بيضحكونا، لأنه مطمئن، ذنوبيك اتفترت؟ اللي إنت عملته قبل كده ثبتي منه؟ ضمنتني إن ربنا قبل توبتك؟ مطمئن ليه؟ هو قرى قوم لوطن ربنا أهلكها بسبب كفرهم ولا بسبب فعل أهل لوطن؟ بسبب الاتنين، يبقى زي ما الكفر بيهلل المعصية بتهلك، المعاشي ممكن تودي في داهية.

### لازم نفوق.. لازم نفكـر هنعمل إيه في آخرنا

إننا مطمئنين ليه يا شباب؟ دا سعد بن معاذ رضي الله عنه، اللي عرش الرحمن اهتز لموته، اللي الملائكة تنزلت تشييعه، اللي، اللي، ده سعد بن معاذ ضيق عليه قبره، وأخذته ضمة القبر، إننا مطمئنين ليه يا شباب؟ كلمة امتحان بترعيينا، طيب كلمة امتحان القبر مابتربعناش ليه؟ كلمة سلطان بتموتنا، طيب ألم الموت ما يمومتناش ليه؟  
كلمة سجن بتخوّفنا، طيب حبسة القبر مابتخوّفناش ليه؟ تخيل الطالب بتاع الطب ليلة الامتحان ما يبدأ كرش، مطمئن ليه يا ابني؟ طيب يا ابني لو نجحت في التحريري هتعمل إيه في الشفوبي؟ ولو عديت من الشفوبي هتعمل إيه يا ابني في العملي؟ هتعمل إيه؟

إننا مطمئنين ليه يا شباب؟ لازم نفوق يا شباب، لازم نفوق، ألف مرة فكر مين اللي هيقبض روحك، ملائكة بيض الوجوه كأن وجوههم الشمس؟ ولا ملائكة سود الوجوه، والعياذ بالله، معهم كفن من أكفان جهنم؟ مين اللي

هيقبض روحك؟ ملائكة هنقول أخرجوا أنفسكم؟ ولا ملائكة هنقول أبشروا بالجنة؟ لازم تفكر ألف مرة، يا جماعة لازم تفكر ألف مرة، لازم نفكّر مليون مرة هنعمل إيه في آخرتنا، ومطمئنين ليه؟

ليلة خميس، ليلة الخميس، وليلة الأربعاء، وليلة الثلاثاء، وليلي الشباب، ليالينا يا جماعة، ليالينا اللي في معصية الله سبحانه وتعالى بتضيع وأعمارنا اللي في معصية الله بتضيع، هنفوق امتى يا شباب؟ هنفوق امتى وهننتبه امتى؟ لو رسول الله صلى الله عليه وسلم دخل عليك في حياتك هيعرض على إيه؟ ولو دخل عليك في حياتك هيشفوف إيه؟ وهيحبك ولا هيكرهك؟ لو راك رسول الله لأحبك، الكلمة اللي ابن مسعود قالها لأحد التابعين كان ربيع بن خثيم، قال له: "لو راك رسول الله صلى الله عليه وسلم لأحبك"، إنت لو شافك هيحبك؟ إنت لو شافك هيحبك؟ إحنا لو شافنا هيحبنا حبيب الله يا جماعة؟.

### حال الملتزمين لما النبي يزورهم

تخيلوا النبي بقى زار بيت بس بيت تاني، بيت أخ ملتزم، بيت أخت ملتزمة، بيخبط، إنت كنـت بتعدي النقاب بتاعك اللي إنت هتبليسيه إن شاء الله، بتعدي النقاب بتاعك أصلك نازلة حلقة تجويد وبعد كده طالعة على الدرس وبتجري تفتحي.

وإنت كـنت يا دوب بتحط العطر وبتعطر لحيتك وبتعطر شعرك وبتعطر هدومنك وبتحط السواك في جيبك وبتحط مصحفك في جيبك وبتجري عشان وراك درس، وراك درس نازل تحضره في الجامع بقيت إمام، تخيل النبي عليه الصلاة والسلام لقى المصحف محظوظ ومفتوح على آخر صفحة كنت إنت واقف بتقرأ فيها.

أنا أعرف أخ وأخت سبحان الله، يا جماعة لو الزوج والزوجة ليلة الخميس قعدوا مع بعض ليلة وقالوا إحنا الليلة دي هننـقعد مع بعض نتابع حفظنا في كتاب الله، نصلـي ركعتين قيام ليل مع بعض، غير ليلة الخميس، ليلة الخميس بيحصل فيها إيه؟ النكـسة بتاعة الأمة، شباب الأمة بيعملوا فيها إيه؟ أحـوال شبابنا إـيه؟

### عايزين نخلـي ليلة الخميس ليلة دعوة إلى الله

لو النبي دخل علينا وجه لأمتنا هيقولنا إـيه؟ وهيـعمل معانا إـيه؟ ولو مـلك الموت دخل علينا؟ قال رسول الله صلى الله عليه وسلم في صحيح مسلم: "العبادة في الهرج كهجرة إلى"

العبادة في الهرج كهجرة إلى رسول الله صلى الله عليه وسلم، الهرج زي ليلة الخميس كـده، يعني الليلة دي لا يمكن نـشارك الناس في معاـصـيـهم أبداً أبداً، يعني الليلة دي لازم لازم زي ما هـم بـيـمارـسـوا الـهرـجـ فيهاـ، لـازـمـ إحـناـ نـعـبـدـ رـبـنـاـ يـاـ شـبـابـ، لـيلـةـ الخميسـ المـفـروـضـ تكونـ لـيلـةـ قـيـامـ لـلـيلـ، لأنـ النـاسـ بـتـعـصـيـ رـبـنـاـ إـحـناـ نـطـيعـهـ، لـيلـةـ الخميسـ ديـ الليـ جـايـ بـعـدـهاـ فـجـرـ الجـمـعـةـ أـفـضـلـ صـلـاـةـ فـيـ الـأـسـبـوعـ، لـيلـةـ الخميسـ.

أعرف أخ بيـعـتـ رسـاـيلـ لـعـشـراتـ لـعـشـراتـ لـيلـةـ الخميسـ يـعـرـفـهـمـ بـكـرـةـ خطـبـةـ الجـمـعـةـ فـيـ المسـجـدـ دـهـ والـمسـجـدـ دـهـ والـمسـجـدـ دـهـ، سبحانـ اللهـ، لـيلـةـ الخميسـ دـيـ لـيلـةـ دـعـوـةـ إـلـىـ اللهـ، نـقـذـ الشـيـابـ، إـبـلـيـسـ يـشـتـغـلـ وـإـحـناـ نـنـامـ؟ـ إـبـلـيـسـ

يشتغل واحنا نموت؟ إزاي يا جماعة؟ ده الشباب بيقول لك ليلة الخميس عيد ميلاد إبليس، عايزين ليلة الخميس ليلة الكبس على نفس إبليس، ليلة الصفع على وجه إبليس، ليلة الخميس دي ليلة دعوة إلى الله، ليلة إنقاذ، ليلة إنكار منكر، ليلة دعوة للشباب ولليلة نشر للخبر والهداية.

ليلة إنك تحط في العربية بتاعتك ١٠٠ سي دي و ٥٠ شريط كاسيت، وإنانت ماشي بالعربية بتاعتك كل ما تلاقي شاب مشغل في العربية بتاعته أغاني تحذف له سي دي هدية بس تقول له أمانة قدام ربنا تشغله، أو شريط كاسيت هدية، ليلة الخميس دي ليلة شحن أسبوعي، شحن إنك تقدر تسمع الشرايط اللي اتقالت الأسبوع ده، تقدر تسمع شريط تحضري درس، تقدر في حلقة تجويد، تقدر في صحبة إيمانية وسهرة إيمانية، تشحّنوا فيها الإيمان في قلوبكم.

### لو النبي زارنا دلوقت هيقول لنا إيه؟

إنما اللي بيحصل ده يا جماعة ماينفعش يا جماعة، ماينفعش، لو النبي زارنا دلوقت هيقولنا إيه؟ لو النبي زارنا قلبه هيتحرق علينا عليه الصلاة والسلام قد إيه؟ لو النبي نزل شاف الشباب في الخيمة الرمضانية قاعدين من بعد العشا لغاية الفجر، قاعدين على الشيشة وقاعدين على الغنى، وقاعدين على المعاف، وقاعدين على الرقص هيقول إيه؟ لو النبي جه لقى الناس بدل ماهي بعد العصر قاعدة في الجوامع بعد العصر قاعدين في الدورات الرمضانية هيقول إيه؟ لو النبي جه وشاف العشرين مسلسل اللي اتصرف عليهم ٥٠٠ مليون جنيه هيقول إيه عليه الصلاة والسلام؟

لو النبي جالنا يا جماعة هيقول إيه؟ الجرح اللي في قلبه حقيقةً هيبقى إيه؟ هيبقى اللي شتموه بره؟ هيبقى اللي هانوه بره عليه الصلاة والسلام وكراهة النبي فوق كل ده والا هيبقى احنا ومعاصينا وذنبينا وبرحلك ومكيالجك وبارفانيك والنادي والقهوة والنادي بتاعتنا والشوارع والكورنيش والبلاجات والجامعات والوقفات والعلاقات والجواز العرفي وعبدة الشيطان، النبي عليه الصلاة والسلام لو جه هنعمل إيه يا شباب عايزين وقفه مع نفسها يا شباب عايزين جرس إنذار، عايزين جرس تنبيه، عايزين ن فوق احنا دلوقت في آخر فقرة في الدرس.

### الوصيات

احنا دلوقت يا جماعة في فقرة التوصية الفقرات العملية هنعمل إيه؟ على فين يا شباب؟ على فين؟ على تغيير حياتنا كلها، على فين ياشباب؟.

### قولها إنت من دلوقت "سُحْقا سُحْقا"

أنا النهاردة هأدخل دولابي وهأدخل بيتي وأشوف محمولي وهأشوف أوضتي وهأشوف كل حاجة في حياتي وهأنزل لعربيتي أي حاجة لو النبي عليه الصلاة والسلام جه مش هيرضي عنها غيرها دلوقت على طول لأن

الكلام ده كله أنا هآخده وأنا رايح له على الحوض "قبل أن تلقى رسول الله على الحوض" رسول الله قبل ما يموت عليه الصلاة والسلام بساعات نزل وعصب رأسه وقعد على المنبر ولم الصحابة وقال لهم: "فاصبروا حتى تلقوني على الحوض" صحيح البخاري

يا شباب اصبروا حتى تلقوا رسول الله على الحوض، كل معصية في حياتك رسول الله لا يرضها هتتحمل على رقبتك وانت رايح وانت رايحة تقابلني رسول الله على الحوض وممكن يقول لكم: "سُحْقًا سُحْقًا" صحيح البخاري

كل حاجة الرسول ممكن يقول لك بسببها سُحْقًا على الحوض وانت هتموت من العطش وهتموت من الشوق إليه قولها انت من دلوقت سُحْقًا سُحْقًا، كل حاجة في حياتك الرسول عليه الصلاة والسلام ممكن يقول لك بسببها على الحوض سُحْقًا سُحْقًا قولي لها انت من دلوقت "سُحْقًا سُحْقًا".

عايزين نفوق يا شباب عايزين ننتبه يا جماعة لما نقابل رسول الله على الحوض هنعمل إيه، لما نقابل حبيب الله على الحوض هتروح وسط مين وانت رايح على حوض رسول الله صلى الله عليه وسلم وبتيجي على الحوض وتلاقي واحد جاي من وراك "نحرى دون نحرك يا رسول الله" ده مين ده؟ ده سيدنا أبو طلحة اللي فدى النبي برقبته في غزوة أحد طيب أنا هأروح وسطه فين؟.

وتلاقي واحد جاي بيجري "تركت لهم الله ورسوله" ده مين؟ ده أبو بكر الصديق اللي ضحي بكل حاجة عshan نصرة النبي عليه الصلاة والسلام وتلاقي واحد تاني قايم وكله دم ويقول: "لا عذر لكم عند الله إن خلص إلى رسول الله وفيكم عين تترف" ده مين ده؟ ده سعد بن ربيع الأنصاري وهو يعتبر إن الخيانة إن احنا نتخل عن نصرة رسول الله في غزوة أحد.

وتلاقي واحد تاني جاي متقطع حتت ده مين ده؟ ده مصعب بن عمير اللي انتقطع وهو ماسك الراية وبيدافع عن رسول الله في غزوة أحد.

وتلاقي واحدة تانية بتقول: "كل مصيبة بعدك جلل يا رسول الله" دي مين دي؟ دي المرأة اللي أبوها وابنها وأخوها ماتوا في غزوة أحد ولما شافت النبي سليم قالت له بس المهم إني اطمانت عليك "كل مصيبة بعدك جلل يا رسول الله".

هتلاقوا ألف يا جماعة هتلاقوا ناس حب النبي اترجم في حياتها ترجمة عملية وضحت بكل حاجة في حياتها عshan رسول الله صلى الله عليه وسلم.

هنفوق إمتي يا شباب؟ هنفوق إمتي؟ ليلة الخميس العار لما ربنا بيطلع سبحانه وتعالى علينا ليلة الخميس يا ترى بيعضب على الأمة قد إيه؟ يا ترى بينظر للأمة نظرة غضب والا نظرة رحمة؟ يا ترى يا جماعة لو فضلنا كده هنروح على فين؟ على فين يا شباب؟ على فين؟ رايحين ومودين الأمة كلها وراكوا على فين؟

انتوا القاطرة الأولى في قطار الأمة اللي شادد الأمة كلها، وآخدin الأمة كلها على فين؟ وآخدin الأمة على الجنة والآ على النار؟ هتقودوا أمة محمد على فين؟ شباب الصحابة فتحوا العالم وغيروا العالم، انتوا بتعملوا إيه؟ أنا عايزكم تبقو طاقة، عايز كل يوم في حياتكم يبقى إنجاز، يبقى طاعة جديدة من طاعة لطاعة، من نور لنور.

### عايزين نهاجر إلى الله

على فين يا شباب؟ هننطلق إلى الله، هنعرف ربنا سبحانه وتعالى، أنا الليلة كلمتكم عن لو زارنا رسول الله هنعمل إيه، عشان كده بأكده عليكِ، بالله عليكِ، أقسمت عليك بالله قوموا دلوقت كل حاجة في حياتنا، في دولينا، في قلوبنا، في كميوترنا، في محمولنا، في دشنا، في قنواتنا، في لبسنا، في مكتبتنا، في أفكارنا، في أصحابنا، في زياراتنا، في مشاورنا، في كل حاجة.

أي حاجة من دي النبي لو جه مش هيفرضي عنها عليه الصلاة والسلام شيلوها دلوقت قبل ما تندموا يوم القيمة، قبل ما تندموا على الحوض لما يجي الصحابة، اللي كل حاجة ماترضيش النبي شلوها، اللي رايحين للنبي شايلين حسنان ورا حسنان، وإنْتَ واقف مكسوف هاروح بالصورة دي إزاي؟ هأدخل للرسول مع دول إزاي؟ هأدخل على النبي بال حاجات اللي شايلها على رقبتي دي إزاي؟ مكسوف منك يا رسول الله، خجلان منك يا رسول الله، خجلانة منك يا رسول الله.

ده فيه آثار يا جماعة إن العصاة يوم القيمة لما بييجوا على حوض رسول الله عليه الصلاة والسلام بيسقط لحم وشهم من الخجل، من الخجل، من كتر الخجل من رسول الله، إزاي؟ يا شباب دلوقت النوادي هرج، دلوقت الدنيا هرج، دلوقت بلاد المسلمين كلها بقت هرج، "العبادة في الهرج"، في صحيح مسلم، عبادة في الهرج اللي احنا فيه ده، عبادة في المعاصي اللي احنا فيها ده، عبادة في الوقت اللي كل أصحابك وأصحابك بيعصوا ربنا فيها "كهجرة إلى".

أيها المهاجرون إلى الله، هتبقي مهاجرة إلى الله ولا لأ؟ هتبقي مهاجر إلى الله ولا لأ؟ هتبقي زي أم كلثوم بنت عقبة بن أبي معيض ولا لأ؟ هتبقي زي سلمان الفارسي ولا لأ؟ هتبقي زي أم سلمة وهتبقي زي أبو سلمة ولا لأ؟ هتبقي زي صهيب الرومي، وإنْتَ رايخ للنبي عليه الصلاة والسلام وهو بيقول لك ربح البيع، ربح البيع يا أحمد، ربح البيع يا محمد، ربح البيع يا مريم، يا فاطمة، يا إبراهيم، يا فلان، يا فلانة، ربح البيع يا شباب، ربح البيع يا شباب، ربح البيع يا شباب.

النبي على الحوض وهو بيستقبلنا وبيضممنا بيقول لنا ربح البيع يا شباب، وإنْتَ بنقول له احنا سبنا كل حاجة يا رسول الله عشانك، غادرنا الناس أحوج ما نكون إليهم، زي المؤمنين بيقولوا يوم القيمة سبنا كل حاجة، غادرنا كل حاجة يا رسول الله، سبنا كل حاجة عشانك يا رسول الله زي ما صهيب ساب كل حاجة عشان يهاجر لك

في المدينة، والنبي يقول ربح البيع يا شباب، ربح البيع، ربح البيع يا أختي، ربح البيع يا أخي في الله، هندخل في الصفقة الرابحة ولا لأن؟ هندخل في الصفقة الرابحة ولا لأن؟

### عايزين نخلِّي ليلة الخميس صفة على وجه إبليس

ليلة الخميس، ليلة الهرج، ليلة الخميس ليلة المهاجرين إلى الله، مانشاركش، ندعوه، نشحن، نتعبد، نقيم الليل، نستتني خطبة الجمعة اللي بعدها عشان إن شاء الله تبقى حياتنا كلها تبقى طاعة وإيمان، نغير الواقع، نعمل ليلة الخميس كلها طاعة، كلها دعوة، كلها انطلاق، كلها تغيير، كلها إيمان، يلا يا شباب، الحماس يا شباب، يلا يا شباب، الدين يا شباب، يلا يا شباب فعلوا حب ربنا اللي في قلوبكم والخوف من ربنا اللي في قلوبكم، وحب الملك والشوق إليه اللي في قلوبكم لمواقف عملية، حب ربنا خرجوه في شكل تغيير للدنيا كلها، إن الدنيا كلها تعرف ربنا وتتوب لربنا سبحانه وتعالى، وليلة الخميس تبقى صفة على وجه إبليس.

### دُعَاءُ الْخَاتِمَةِ

اللهم تب علينا، اللهم أصلح أحوالنا، اللهم تقبل منا صيامنا وقيامنا، اللهم تقبل منا توبتنا، اللهم إنا نعوذ بك أن نُرُد بعد أن تُبَّنا إلينك، اللهم تقبلنا واقبلنا واجمعنا مع حبيبك محمد صلى الله عليه وسلم في الفردوس الأعلى، اللهم اجمعنا معه على حوضه الكريم في ظل عرشك، اللهم إنا نشهدك أننا نحبه ونحبك، اللهم إنا نشهدك أننا عبدناك حباً فيك وشوقاً إليك ورغباً ورهباً فاقبلنا وتقبلنا يا رب العالمين. أقول قولي هذا وأستغفر الله لي ولكم، سبحانهك اللهم وبحمدك، أشهد أن لا إله إلا أنت، أستغفرك وأتوب إليك، وجزاكم الله خيراً.

تم بحمد الله

شاهدوا الدرس للنشر على النت في قسم تفريغ الدروس تفضلوا هنا:

<http://forums.way2allah.com/forumdisplay.php?f=36>